

## Tilskotsordning for opplæring i norsk for voksne personar med kollektiv beskyttelse for 2022

### 1. Innleiing

Rundskrivet er utarbeidd av Integrerings- og mangfoldsdirektoratet (IMDi) og er basert på retningslinjene for tilskotsordninga på kap. 672, post 60, fastsette av Arbeids- og inkluderingsdepartementet 26.08.2022, i samsvar med § 8 i *Reglement for økonomistyring i staten* og kapittel 6 i *Bestemmelser om økonomistyring i staten*.

Tilskotsordninga består av persontilskot og grunntilskot.

IMDi er ansvarleg for å forvalte tilskotsordninga.

### 2. Mål og målgruppe for tilskotsordninga

Formålet med persontilskotet er at kommunane og fylkeskommunane kan tilby opplæring i norsk til fordrivne frå Ukraina som ønskjer ei slik opplæring, etter integreringslova kapittel 6A. Tilskotet skal også gå til å gjennomføre prøver i norsk etter integreringslova § 37 d.

Målet med grunntilskotet er å betre dei økonomiske rammevilkåra for små og mellomstore kommunar når det gjeld opplæring i norsk.

Tilskotsmottakarar for persontilskotet er kommunar og/eller fylkeskommunar, avhengig av kven som gjennomfører opplæringa.<sup>1</sup> Tilskotsmottakar for grunntilskot er kommunar.

#### 2.1 Målgruppe

Personar mellom 18 og 67 år som har fått opphaldsløyve etter utlendingslova § 34, har rett, men ikkje plikt, til å delta i opplæring i norsk, jf. integreringslova § 37 d.

### 3. Kriterium for måloppnåing

Fordrivne frå Ukraina som har rett, men ikkje plikt, til å delta i opplæring i norsk, bør oppnå eit minimumsnivå i norsk. Kommunen skal, samtidig som det blir gjort vedtak om opplæring, utarbeide ein norskplan. Denne planen skal innehalde norskmålet for deltakaren.

---

<sup>1</sup> Jf. integreringslova § 30.

## 4. Tildelingskriterium

Dette punktet handlar om vilkår, berekningsreglar og informasjon om utbetaling av persontilskot (4.1) og grunntilskot (4.2).

### 4.1 Persontilskot

#### 4.1.1 Vilkår for å få støtte

Kommunen må registrere vedtak om opplæring i norsk i Nasjonalt introduksjonsregister (NIR) for at tilskot skal bli utbetalt. Kommunen må registrere i NIR dei deltakarane som får norskopplæring i vidaregåande skole, for at tilskotet for desse deltakarane skal bli utbetalt til fylkeskommunen.

Basert på data i NIR blir tilskotet utbetalt automatisk til tilskotsmottakarane.

Dersom kommunen allereie har gjort vedtak om opplæring i norsk og samfunnskunnskap etter kapittel 6 i integreringslova, før integreringslova kapittel 6A tredde i kraft 15. juni, skal det gjerast nye vedtak etter integreringslova kapittel 6A, jf. § 1 i overgangsreglar om integreringslova kapittel 6A. Det tidlegare vedtaket fell bort.

#### 4.1.2 Berekningsreglar

Retten til opplæring i norsk gjeld i eit år frå oppstartstidspunktet for opplæringa. Personen må vere busett etter avtale med kommunen og integreringsmyndigheitene for å ha rett til opplæring.

Persontilskotet for opplæring etter § 37 d i integreringslova er eittårig, og heile tilskotet blir utbetalt.

#### 4.1.3 Utbetaling av persontilskot integreringslova § 37 d

For personar med oppstartstidspunkt for opplæringa i 2022 blir det utbetalt persontilskot. Tilskotet blir utbetalt tidlegast i kvartalet etter at ein person har komme inn i målgruppa.

For personar som er i målgruppa, blir tilskotet utbetalt til bustadkommunen. Det er den folkeregistrerte adressa til ein person som er styrande for kva kommune som blir rekna som bustadkommune. For personar som deltar i vidaregåande opplæring på fulltid, blir tilskotet for perioden utbetalt til fylkeskommunen. Kommunen må registrere i NIR dei deltakarane som får norskopplæring i vidaregåande skole, for at tilskot for desse deltakarane skal bli utbetalt til fylkeskommunen.

#### SATSAR FOR PERSONTILSKOT § 37 D FOR 2022

Tilskotsår	Sats
Persontilskot § 37 d (2022)	45 000 kroner

## UTBETALING AV PERSONTILSKOT § 37 D I 2022

Tilskotsår	Tentativ utbetalingsdato	Utbetalinga gjeld
Persontilskot § 37 d (2022)	Uke 42	Nye personar i målgruppa som er registrerte med vedtak om opplæring i NIR for perioden 01.01.22–31.03.22
	Veke 42	Nye personar i målgruppa som er registrerte med vedtak om opplæring i NIR for perioden 01.04.22–30.06.22
	Veke 46	Nye personar i målgruppa som er registrerte med vedtak om opplæring i NIR for perioden 01.07.22–30.09.22
	Veke 7, 2023	Nye personar i målgruppa som er registrerte med vedtak om opplæring i NIR for perioden 01.10.22–31.12.22

Etter utbetalinga av tilskot sender IMDi tilskotsbrev til det elektroniske postmottaket hos tilskotsmottakaren. Kommunen kan også sjå detaljerte opplysningar om utbetalt tilskot i NIR.

Dersom ein tilskotsmottakar meiner å ha krav på tilskot som ikkje er utbetalt, kan tilskotsmottakaren melde frå om dette til IMDi via Kontaktsenter for IMDinett. Fylkeskommunar må vende seg til bustadkommunen til deltakaren dersom dei meiner å ha krav på tilskot som dei ikkje har fått.

#### 4.1.5 Tilskot til annan opplæringskommune

Ein person kan få opplæring i norsk i ein annan kommune enn bustadkommunen. Det er likevel bustadkommunen som er ansvarleg for å gjere vedtak om og sørge for opplæring. Dersom ein annan opplæringskommune skal få persontilskot, må *bustadkommunen* kontakte IMDi via Kontaktsenter for IMDinett for å få dette registrert i NIR.

#### 4.1.6 Deling av tilskot mellom kommunar ved flytting

Dersom ein person i målgruppa flyttar mellom kommunar, må personen melde frå om flyttinga til Skatteetaten for at adressa skal bli oppdatert i Folkeregisteret. Tilskotet blir då delt mellom til- og fråflyttingskommunen med utgangspunkt i informasjonen frå Folkeregisteret. Personen har plikt til å melde frå om denne adresseendringa innan åtte dagar etter flyttinga.<sup>2</sup>

Dersom ein person flyttar etter påbegynt opplæring, blir tilskotet delt mellom til- og fråflyttingskommunen, basert på antal dagar personen har hatt bustadadresse i kommunen. Formelen nedanfor viser berekninga av tilskot til kommune x:

$$\text{Tilskot til kommune } x = \text{Sats for tilskotsår} \times \frac{\text{Antal butidsdagar i kommune } x}{365 \text{ dagar}}$$

#### 4.1.7 Deling av tilskot mellom kommune og fylkeskommune

Fylkeskommunen skal sørge for opplæring av personar i målgruppa som deltar på fulltid i vidaregåande opplæring etter opplæringslova.<sup>3</sup> Deling av persontilskot mellom kommune og fylkeskommune vil skje på bakgrunn av kven som er ansvarleg for opplæringa. Av § 30 går det

<sup>2</sup> Jf. folkeregistreringslova § 6-1.

<sup>3</sup> Jf. integreringslova § 30.

fram at det er kommunen som er ansvarleg for å gjere vedtak for målgruppa, uavhengig av kven som er ansvarleg for opplæringa, som nemnt i 4.1.1. Kommunen skal også registrere i NIR kva fylkeskommune opplæringa skjer i, for at delinga av tilskotet skal skje automatisk.

Formelen under viser berekninga av tilskot til fylkeskommunane for tilskotsår  $i$ :

$$\text{Tilskot til fylkeskommune } X = \text{Sats for tilskotsår } \times \frac{\text{Antal dagar i fulltids vidaregåande skole i tilskotsperioden}}{365 \text{ dagar}}$$

#### 4.1.8 Tilskot ved utreise og tilskot ved tilbakekomst til landet

Dersom ein person i målgruppa flyttar frå landet, beheld kommunen framleis tilskotet dei har krav på.

#### 4.1.9 Tilskot ved dødsfall

Ved dødsfall beheld kommunen heile tilskotet som er utbetalt i dødsåret.

## 4.2 Grunntilskot

#### 4.2.5 Vilkår for tildeling

Basert på data i NIR blir tilskotet utbetalt automatisk til kommunane.

Det er den folkeregistrerte adressa til den enkelte personen som bestemmer kva som er bustadkommunen.

#### 4.2.6 Berekningsreglar

Inngangen til målgruppa er tidspunktet for busetjing etter avtale som gir rett, men ikkje plikt, til å delta i opplæring i norsk etter § 37 d i integreringslova.

Personar som er omfatta av § 37 d, er med i berekninga av grunntilskot i eitt år.

Det er ikkje krav om at eit vedtak må vere registrert for å inngå i berekningsgrunnlaget for grunntilskot.

#### 4.2.7 Utbetaling av grunntilskot

Kommunar som har mellom 1 og 150 personar i målgruppa per 15. januar, får utbetalt grunntilskot. I praksis blir personar omfatta av dette rundskrivet talde med i 2023, som følgje av teljetidspunktet.

Grunntilskotet har to satsar. Høg sats blir utbetalt til kommunar som har frå 4 til 150 personar i målgruppa, og låg sats blir utbetalt til kommunar som har frå 1 til 3 personar i målgruppa. Satsane for grunntilskot i 2023 blir vedtatt i Prop. 1 S (2022–2023).

Etter utbetalinga av tilskot sender IMDi tilskotsbrev til det elektroniske postmottaket i kommunen. Kommunen kan også sjå detaljerte opplysningar om utbetalt tilskot i NIR.

Dersom kommunen meiner å ha krav på tilskot som ikkje er utbetalt, kan kommunen melde frå om dette til IMDi via Kontaktsenter for IMDinett.

## 5. Oppfølging og kontroll

Opplysningar som er nødvendige for å gjennomføre, følgje opp og evaluere opplæring i norsk i samsvar med integreringslova, skal registrerast av kommunen i NIR.<sup>4</sup> I tilhøyrande forskrifter er det fastsett kva for opplysningar kommunen skal registrere. Kommunen skal registrere desse opplysningane innan to månader.

Kommunen skal ikkje legge fram ein særskild rekneskap for tilskot til opplæring i norsk og samfunnskunnskap for vaksne innvandrarak. Dersom kommunen gjennomfører opplæringa til ein lågare kostnad enn det tilskotet dei har mottatt, kan kommunen behalde tilskotet.

IMDi og Riksrevisjonen kan kontrollere at midlane blir brukte etter føresetnadane.<sup>5 6</sup>

## 6. Feilaktige utbetalingar

Dersom ein kommune har fått utbetalt for mykje i tilskot, kan IMDi krevje tilbakebetalt det overskytande beløpet i tråd med ulovfesta reglar om *condictio indebiti*. IMDi har rett til å motrekne det overskytande beløpet med nye utbetalingar av tilskot til kommunen.

## 7. Klagereglar

IMDis tildeling av tilskot etter denne tilskotsordninga er ikkje å rekne som enkeltvedtak, jf. forvaltningslova § 2. Det vil seie at reglane i forvaltningslova kapittel IV til VI ikkje kjem til bruk, jf. forvaltningslova § 3. Kommunane og fylkeskommunane har derfor ikkje klagerett. Elles gjeld reglane i forvaltningslova, for eksempel reglane om habilitet og alminnelege reglar om saksbehandling.

## 8. Foreldingsfrist

Når eit tilskotskrav er forelda, taper kommunen retten til å krevje tilskotet utbetalt.<sup>7</sup> Den alminnelege foreldingsfristen er tre år rekna frå det tidspunktet kommunen tidlegast har rett til å krevje å få tilskotet utbetalt.<sup>8</sup>

Dersom IMDi har eit forelda tilbakebetalingskrav mot kommunen, vil det forelda kravet kunne motreknast med nye utbetalingar.<sup>9</sup>

## 9. Kontakt IMDi

Eventuelle spørsmål kan meldast til IMDi i supportsystemet Kontaktsenter for IMDinett.

---

<sup>4</sup> Jf. integreringslova § 43.

<sup>5</sup> Jf. løyvingreglementet § 10 andre ledd.

<sup>6</sup> Jf. riksrevisjonslova § 12 tredje ledd.

<sup>7</sup> Jf. foreldingslova § 24.

<sup>8</sup> Jf. foreldingslova §§ 2 og 3 nr. 1.

<sup>9</sup> Jf. foreldingslova § 26 bokstav b.